

四庫全書

史部

欽定四庫全書

史部

平定朔漢方畧卷二十三

詳校官編修臣曹振鏞

編修臣裴謙覆勘

總校官進士臣繆琪

校對官中書臣朱忻

謄錄監生臣潘璣

欽定四庫全書

聖祖仁皇帝親征平定朔漠方略卷二十三

五月丙辰朔自察罕布喇克起行

上諭曰察罕布喇克地方草已無多後三旗兵前來不必在此安營過此八九里有水泉處令其駐扎

上諭行兵部曰內府管駱駝前領郝尚圖等星馳運米到此著傳諭八旗各關大每旗給米各三十石古北口宣府綠旗兵給二十二日米及牛羊其米經

留貯不數八十日者亦著補給是日

上駐蹕拖陵布喇克

上諭兵部曰前曾令後三旗兵於明日至察罕布喇克

駐扎一日後日至拖陵布喇克今不必令其駐察

罕布喇克令明日至忒克布喇克地方後日至拖陵

布喇克兵部隨移文鑲紅正藍鑲藍旗大臣等知之

定隨營牧馬法內大臣等奏言防護馬羣甚

屬緊要先到之前鋒兵及漢軍察哈爾營所設

防護人內應將現在此處五旗每旗派護軍五十人增入周圍防護再每旗各派大臣一員宿於各旗防護之處

御營內領侍衛內大臣及護軍統領等仍照前輪班行走今既逼近厄魯特竄處之地

御營內既添設宿衛其防護等處不必著侍衛及內府護軍前往奏入奉

旨甚善侍衛及護軍等皆不令往亦為未可伊等各

有馬匹無人看守且牧馬處有信息亦須令其來
報應著三旗內合派侍衛九員內府護軍十五人
前往又傳

諭曰馬匹最為緊要嗣後安營不必向南宜各隨其
方惟視有水處周圍環繞令兩黃旗居御營後其
餘悉照旗分次察哈爾兵漢軍火器營兵又其次
綠旗兵於御營外環立大營勿令踐營中之草其
馬匹則白晝於各旗營外近處牧放至夜若有消息

卽收入營內斯馬匹不艱於水草而兵行甚為有益著議政大臣會議具奏議曰

上諭極是如此則營制堅固而馬匹於水草不致艱難
兵行良有裨益應卽遵

旨行

從之酌留人馬於拖陵以原任尚書杭愛領之

上諭內大臣索額圖尚書班第曰步行廝役及羸瘦馬匹應留於拖陵地方著留總兵官白斌標下綠旗

兵二百名馬進良標下綠旗兵一百名令其踞水
濬濠築壘扎立一營擇曉兵法能管轄大臣令其
總管杭愛人材壯健堪任管轄著留杭愛於拖陵
地方令其總管總兵官岳昇龍所領兵二百名人
材壯健著撥給白斌以補所留二百兵之缺又八
旗滿兵內有馬匹疲憊不能前行者亦應察明留
之又遣使往噶爾丹時應將所擒厄魯特四人發
回著一併會議具奏又

諭議政大臣等曰喀喇沁王扎西公沙木巴喇錫等
亦有步兵此兵或留或否著問明扎西王等會議
具奏議得問扎西王等據扎西王云我所屬步兵
須盡帶去不留於後公沙木巴喇錫云我旗下
趕車步兵共七百名今現到者惟一百十八人
其餘俱未到此數內五十人我等料理帶去其
餘六十八名及未到者盡行留後應俱照扎西
王等所言行奉

旨公沙木巴喇錫所留之兵著交杭愛其餘知道了
理藩院奏拖陵地方所留喀喇沁公沙木巴喇
錫旗下趕車步兵六百五十人內現到六十八
人俱無口糧應將噶禮所運米糧給與其後至
者若有餘米令其食用若亦無口糧則令左都
御史于成龍原任尚書杭愛量其食用將後至
車內米糧給與奉

旨依議著再留牛十頭羊一百隻若有米時則不必

用具已斃者食之在後米糧陸續可到若未到不能接續即將牛羊節省食用著明白交與杭愛

丁巳

酌留人馬於拖陵併縱所俘厄魯特議政大臣等奏今大兵進征勦滅噶爾丹其步行廝役羸瘦馬匹一遵

上諭留於拖陵地方應留總兵官白斌標下兵二百名馬進良標下兵五十名令其踞水濬濠築壘扎

營此所留兵丁應酌派官員著原任尚書杭愛
留於拖陵令其總管又八旗滿兵內有馬匹疲
憊不能前行者亦令各營大臣夸蘭大等查明
奏留先經會議到拖陵地方時再行遣使往噶
爾丹處今遣使往噶爾丹應將所擒厄魯特四
人一併放回或於本月初二日初三日遣往候

旨定奪奉

旨依議著明日遣去

命免官兵所貸俸餉

上諭議政大臣等曰這次中路西路兵所乘馬人各四匹內借官庫銀買者幾匹出私索買者幾匹著移文尚書馬齊令文一到即將馬主姓名一一察明存案又傳

上諭議政大臣等曰這次中路西路兵所騎四匹馬內有借庫銀買者著盡免還庫佐領下兵丁各出私索買給出征人者著官給馬價即通行曉諭

又

諭曰出征護軍校及護軍等俱得官馬大臣侍衛等馬匹牲口俱各自備自出師以來俱於斥堠防護等處行走衆皆獲有恩賞惟大臣侍衛及內府官員並無可賞之物著將大臣侍衛內府官員等起程時預支八月一季俸銀俱免扣除又

命總兵官岳昇龍等戍官兵退縮者先斬後聞

上諭行兵部曰征討莫要於法令奮勇登先者錫之恩

賞怯懦退後者議罪俱繫定例岳昇龍馬進良白
斌等人材壯健饒有韜略繫簡選用之人其所帶
來官兵皆願効力具呈來者今已逼近厄魯特噶
爾丹若遇敵交戰時副將以下至兵衆人等有退
怯違令者著該總兵官正法奏聞嚴飭督運于成
龍于成龍移咨行在兵部內開兵部咨稱四月二

十七日傳

諭今中路大兵已逼近噶爾丹西路大將軍費揚古

兵亦已甚近大兵糧餉關繫甚要兩路大兵合在一處則需用糧餉甚多著速行文于成龍令其多方設法將所運之米作速運至為此移咨前來我在和爾博等處督催車運於沙上鋪墊柳枝令車輛易過將直隸八運車內所餘米糧酌留和爾博等處因此車輛稍輕於二十九日盡出沙磧又將山東第一運車內米糧亦令酌留已過噶爾圖地方我即於二十九日自滾諾爾啟行

盡力催趲前運車輛將後運車內米糧亦令酌
留令侍郎李鈞左通政喀拜親身催趲前行所
留餘米即便交付三省道府等官令其接續轉
運至喀倫內諸驛站得

旨于成龍報內止稱米車已出沙磧竝未開寫運至
何處及米糧數目著兵部再移咨去

優擢藍翎侍衛興永朝郎中噶禮

上諭內大臣等曰藍翎侍衛興永朝前因其自大性躁

故爾革職今因其有膽氣人材壯健著署副都統
於鑲黃旗漢軍火器營內行走又

諭大學士伊桑阿曰噶禮將第一運米星速運至殊
有勞績其人亦堪用著於其應陞之缺過缺即補
召裕親王福全等前赴大營

上諭吳達禪曰今日裕親王恭親王簡親王勿宿特克
布喇克著至此地宿仍令諸王親帶厄魯特逃來
阿木呼郎多爾濟塞稜偕來可令彼在前行

五月初二丁巳

上諭皇太子曰比來未得汝奏章朕懷懸念今汝奏至
得仰悉

皇太后萬安因待費揚古之兵駐蹕數日馬皆稍肥風土
水草與前示汝者無異恐敵人知覺前哨仍附近
大營未令遠去此時彼聞知與否無由能悉朕躬
固安但早夜焦勞洵為至極諸皇子諸王并諸臣
工以及將士皆好皇太子佳否在京諸皇子俱佳

否此處別無他物惟有砂石耳四月三十日車林渣卜等七台吉至伊等與納木渣爾托音同在一處向被噶爾丹搶掠敗遁渡克魯倫河北在俄濃一帶地方因馬匹疲乏今始得向內地移營來言其故并遣送所獲厄魯特二人赴京與朕差往烏爾輝之人相遇因來傍大兵之後朕厚加賞賚諭以噶爾丹去此不遠爾等速入喀倫車林渣卜欲來請朕安願為効力止將伊眷屬遣入喀倫身赴

朕營喀爾喀之車陳汗亦來今尚未至自京師所
賫奏章於五月初二日辰時至朕在此整齊軍旅
於初四日進勦敵人情景尚未得聞相距二百三
十里地已漸近規模略可見矣四月二十九日頭
運糧車至八旗綠旗內府兵蒙古兵及職事人員
酌量增給支放米糧時營外堆積如山觀者擁塞
內喀爾喀諸人云我等意料滿洲斷不能如此而
來由今觀之凡聖主所經可將京師諸物盡載行

營中也真為可畏莫不擣舌驚駭將士志氣與在京同其勇奮情狀未能備述朕之心思則非如在京時矣事體重大期出萬全非可苟圖僥倖故既殫心力復默禱

上蒼以行之耳特諭

戊午

命繪陣圖傳示八旗

上諭內大臣公常泰曰綠旗兵著列於鹿角中間綠旗

兵之次將兩翼八旗之漢軍砲位烏鎗排列漢軍
火器之次將八旗滿兵馬上所載之砲位分翼排
列鹿角後之頭隊兵令各按旗分排列烏鎗護軍
次列護軍又次列烏鎗驍騎凡八旗俱照此排列
二隊兵著於頭隊後排列傍隊兵既無砲位將漢
軍子母砲每旗給與兩位此砲位著滿洲烏鎗手
驍騎兼管看護陣勢著分張排列爾與議政大臣
等會議具奏常泰等隨即遵照

上諭繪圖陣勢式樣進呈奉

旨這式樣甚好著議政大臣等同閱議奏欽此臣等
會議得

皇上諭旨指授俱已周到應即照此遵行交與兵部曉
諭八旗并行註冊

報可

命各塘報到驛米數

諭行兵部曰今第一運米車米馱若至某驛站即令

管站人等問明所至米數急速報聞

命衆軍節省米糧

上諭行兵部曰米糧關繫緊要後隊米糧恐不能卽至朕盡力節省食用衆人亦應各盡力節省各營內若某營米糧先盡俟回京時朕必嚴察議處某營米糧因節省有餘多食數日者朕亦必嘉美格外視之著曉諭各營又傳

諭內大臣等曰八旗前鋒漢軍火器營及綠旗兵著

今日飯畢即行離此十里有水泉處扎營明日著
在大營行李前啟行

命設驛於塔爾渾柴達木以便輓運

上諭行兵部曰五處驛站人及馬匹著留於原任尚書
杭愛處其前途設站人員馬匹照常帶往安設俟
御營至克勒和朔即遣賢能官一員前往杭愛處
將所留五處驛站從塔爾渾柴達木一帶速行安
站令運米車輛由此站路行走俟五處驛站安置

畢將歐德哈爾哈一路驛站撤回以內大臣阿密達等分隸兩脇軍時內大臣阿密達聞散宗室哈

爾薩都統喀代護軍統領桑格俱奏請効力

上命內大臣阿密達護軍統領桑格在左脇軍中出戰
聞散宗室哈爾薩都統喀代在右脇軍中出戰
已未

命趣運糧至拖陵酌留米於喀倫迺地以備旋師
諭大學士伊桑阿曰移文運糧左都御史于成龍著

將後運糧內六七千石選擇牲口作速運至拖陵
地方預備其餘米石俱著留貯喀倫近地以備凱
旋之用如此則米糧得以速至牲口亦不至因乏
矣著會議具奏議曰若將後運之糧盡行運送不
能即到且牲口亦致因乏應皆欽遵

諭旨行奉

旨依議

遣長史多禪等賫

勅往諭噶爾丹先是議政諸臣議俟到拖陵日遣使
於噶爾丹奉

旨准行至是以

勅書賜物及所俘厄魯特窩齊爾等四人交公主長
史多禪中書阿必達令一等侍衛喀瓦爾達一
等台吉阿喇卜坦以兵衛之送至燕圖庫列圖
厄魯特窩齊爾等四人俱賞以衣服曉諭以師
來之故

上諭喀瓦爾達阿喇卜坦曰爾等不必到克魯倫度其地形古爾班土爾罕巴爾代哈當有敵人戍守爾等若往克魯倫則略迂繞彼必截爾等之後爾等勿得過燕圖庫列圖即從彼地遣伊等前去未遣伊等之前縱我所擒四厄魯特往致聲息續遣我使臣可也倘遇厄魯特勿與之戰但令勅書使臣到彼則已

勅諭噶爾丹曰朕統御萬邦惟以人命為重從來不

喜殺伐爾厄魯特喀爾喀向皆奉我職貢之國爾等交惡搆兵以來朕並未嘗偏徇喀爾喀而於爾有異視也喀爾喀為爾所敗投朕乞命如朕不救之則皆饑斃矣朕之濟人非特於喀爾喀如此也凡諸國人有窘迫來歸朕即救之與此相同已明諭爾數次矣爾奏章來索喀爾喀折卜尊丹巴庫圖克圖土謝圖汗言之不已朕始終不以喀爾喀為直曾諭爾此事非懸議所能結當會盟以講之爾

又以生計窘乏不能前來又以誓書所無之言屢
向我使臣喇嘛支吾回奏阿爾尼巡行邊塞猝遇
爾兵不待朕旨與爾交戰特遣王與皇子與爾議
好爾屬下人又先攘臂吾人不能默坐是以與戰
其時所發他路之兵朕急遣人止之勿與汝戰爾
前年就水草野獸之地游牧至巴顏烏闌遂掠喀
爾喀之納木扎爾陀音朕部下喀爾喀不安特遣
問故又約與議盟今朕與汝若不覲面明議此事

而定之不但爾國難存而我界上人民亦不得寧
居因爾來既近故欲與會盟朕已秣馬繕備朕躬
於三月初旬起行西路之兵於二月十八日起行
黑龍江兵於四月初六日起行盛京寧古塔兵於
三月起行今朕躬及各處兵俱已出喀倫與汝逼
近西路之兵俱已到土喇河東路之兵俱已溯克
魯倫河而來朕向崇禮義順天理而行不恃勢力
戕滅他人朕果恃勢力則不遣使矣竟統各路之

兵而勦滅汝無所不可朕乃不忍生靈橫被鋒鏑
是以抒誠特遣使命朕與汝等覲而定議指示
地界爾照舊貢獻貿易則爾國安生而我邊民亦
安乃協朕保列國如赤子之意豈不休歟朕斷不
以計誘人爾勿疑畏爾若疑畏退而避去則事無
了期矣爾亦一有識之人何不曉事如此朕來欲
與各處將帥閱兵已傳令伊等勿戰此非朕虛言
也爾如不信可遣人往視若再不信可留朕所遣

使臣內一人在於爾地倘各處兵進而攻汝汝即
差所留人沮而止之一面遣汝舊使前曾廷見朕
所識之人為使爾遣大察朕亦回遣大察朕為統
御萬邦之元后斷不誘人而破滅之爾或不信妄
動而去則虛朕種種美意而生靈有不利矣朕茲
開誠特賜汝煖帽蟒袍粧緞掛純金鈎併巾纓帶
一條靴襪及幣十端銀二百兩以公主長史多禪
中書阿必達為使爾其籌之五日內遣汝使偕我

使來復自古以來雖敵國無害使臣之理况朕與
汝向無隙乎若期內不來則必害我使矣特諭

庚申

上駐蹕阿敦齊陸阿魯布喇克

命蒙古兵編為行伍

上諭大學士伊桑阿曰蒙古兵未諳戰法著議政大臣
等將領蒙古兵之大臣會議派出具奏隨以蒙古
大臣等職名入奏奉

旨著將阿爾尼拜音察克西喇喇錫派出理藩院開
列外藩隨

駕出征札薩克喀爾喀王以下附丁以上共一千九百
九十二人入奏奉

旨著問其中有欲爭先効力者爾等編為隊伍具奏
理藩院隨會集札薩克喀爾喀諸王台吉等遍
問之諸王台吉等皆願頭隊行走爭先前進奏
入侍衛關保傳

上諭曰部院大臣等今亦編次隊伍可諭土謝圖王達爾漢王等爾等編次隊伍今已如何朕意欲令札薩克喀爾喀王等領其護衛隨從一二人侍從朕側其餘共為一隊選其能者使領之俱在一處侍從朕後隨所指授即令前進若不如是伊等俱繫各札薩克處湊合之人與在內熟鍊之兵衆共在一處不諳隊伍不通言語必致錯亂與在內兵同編隊伍似為不妥據土謝圖親王等奏云臣等前因

不諳故欲在頭隊行走爭先前進蒙

皇上明白傳諭臣等今始得知我等蒙古俱繫各札薩克湊合之人不諳隊伍言語不便入隊行走

上諭極是臣等一遵

上諭指授行走土謝圖王達爾漢王又奏云臣等札薩克人內年少者多喀爾喀等又俱繫新人不諳軍

法我朝軍法素嚴理應明白曉諭奉

旨欲曉示軍法甚善喀爾喀貝勒西地西里貝子益

楚克俱令在朕處其編次隊伍亦宜照此行公沙木已喇錫亦令率所屬兵入此隊行走其札薩克兵著貝勒巴克席姑爾為總統將十人列為一小旗現今人多旗少著添給小旗每旗選一材能者為長編為隊伍令其操演理藩院隨議得札薩克喀爾喀諸王及貝勒貝子公札薩克台吉外自台吉以下附丁以上十人為一小旗十小旗為一甲喇俱照例設叅領一人以轄之伏候

欽點至兵部律例向譯蒙古文俱已頒行今當再發
得

旨著貝勒阿必達博木博原封王之俄七里公格勒
爾沙木巴喇錫車木楚克納木渣爾阿玉西等管
領甲喇伊等叙功時俱同台吉等叙功令各旗推
台吉等為長旗內官員及閑散人令其背旗餘依
議

辛酉早

上於途次命蒙古兵設伏

諭科爾沁巴克席姑爾貝勒喀爾喀車木楚克納木
扎爾公等曰顧爾班圖爾漢等地方有賊所設哨
探彼處有阿思哈圖山爾等可在彼埋伏賊必出
阿思哈圖山來窺我營我軍前往追擒爾等即行
接應是日

上駐蹕枯庫車爾

命扎西王兼領察哈爾兵

諭行兵部曰扎西王人材壯健其屬下兵亦堪用應
令兼領察哈爾兵行走著會議具奏隨議扎西王
人材果健其屬下人亦好且繫王爵察哈爾兵
應令兼領總管而行

上從之

喀瓦爾達等奉差護送多禪等還復

命先是遣發公主長史多禪中書阿必達賚

勅往諭噶爾丹之時使一等侍衛喀瓦爾達一等台

吉阿喇卜灘等率前鋒二百名護送多禪等

上諭喀瓦爾達等曰爾等勿得過燕圖庫列圖卽從彼地使伊等前去如遇厄魯特勿與交戰但勅書使

臣得到則已至是喀瓦爾達等還奏臣等五月初

五日到克魯倫河不見敵人踪跡想敵人已去

不甚戒備而厄魯特自山上探望見之初六日

黎明有厄魯特十許人來截取馬羣馬羣中護軍

伙軍人等發矢射之收馬匹至本營我兵排列

正欲交兵臣等仰遵

諭旨喝止諸人勿動

勅書重大必達之始善遂令侍讀學士殷札納帶厄魯特名俄齊爾者前去殷札納往控丹濟喇馬
勅言曰我等係

聖朝使臣不得無禮又厄魯特俄齊爾自言既不殺彼
又

賞賜遣回告之以

聖上親來矣將軍費揚古亦下俄爾洪上喇而來丹濟
拉大駭失聲遂領

勅書收兵急去臣等亦收兵而還

上諭皇太子曰朕所統大兵以初四日前進會天雨於
五日進兵軍丁馬健在京所給馬有全存者亦有
存四匹三匹二匹者大概整肅此行也喀爾喀及
內扎薩克蒙古甚得其力凡偵探斥候單行差遣
之處皆用此屬一一書示不勝其煩旋師之日而

言之朕所遣羅卜城額爾得尼台吉來據奏俄濃
下流有塔布囊烏特引弓之人千名胡倫布爾之
土爾希木地方有齊卜齊努特數百家今阿里牙
扎薩克之阿爾薩蘭衛寨桑等似欲全收伊等向
喀倫前來此等人若歸降則巴爾呼喀爾喀更無
餘矣此亦大快事也今漸近克魯倫河我蒙古馬
健故於初五日射獵野驃黃羊蒙古喀爾喀等陸
續來會者二千有餘遣用有濟給以軍律署為官

校編之部伍車陳汗來見其較前頗優茲已過漸
海山川形勢雖同而草漸蕃廡初六日次枯庫東
爾湖此地即去年噶爾丹掠納木渣爾拖音之處
也去克魯倫百七十里

壬戌

命大兵排列前進時已得噶爾丹所在實音

上重列軍行次序

躬率前鋒兵行次八旗前鋒兵排列而行次綠旗兵居

鹿角之中次左右翼八旗漢軍砲位烏鎗兵次
八旗滿兵馬上馱載砲位俱按翼排列而行其
鹿角後頭隊兵列各旗內烏鎗手護軍次列
護軍次列烏鎗手驍騎排列而行二隊兵亦照
頭隊排列傍隊兵每旗子母砲著滿洲烏鎗驍
騎兼管協力看護此後三旗大臣侍衛等領龍
纛而行諸王及

皇子等各在纛前進發內府官兵執事人等部院

官員及蒙古兵俱排隊伍按列而行

御用行李及各營行李按各旗分隨兵後行俱有防護行李官兵軍威之盛彌山遍野不見涯際前一

日微雨是日天氣清明蒙古地方寬廣大兵整齊嚴密肅然無聲旌纛甲冑火器刀鎗日中晃耀奪目深可震怖噶爾丹雖素凶悍瞭望軍容未有不膽裂思遁者矣

上在途時一等侍衛喀去遣人來奏曰臣等奉

肯前往阿思哈圖山探視遇厄魯特數人俱牽散馬
前來潛窺我軍營壘賊遙見我等倉皇逃遁追
至阿思哈圖山之東遇巴克席姑爾貝勒等一
同追逐

上笑曰何必追逐任伊等往報噶爾丹可也

駕至燕圖庫列圖地方將駐蹕所有水泊俱涸衆皆憂
之鄉導大窘四走覓水

上見之諭喀爾喀和碩額駙噶爾臧云此地向為有水

之地今忽無水豈

上天欲我軍直抵克魯倫河乎但步兵已行五十餘里
今又行四十餘里無水之地倘遇敵人何以進戰
况後隊之兵日暮乃得至爾今即往可諭爾父杜
稜王札什率其兵千餘人立於燕圖山之高处殿
後以俟大軍過果倘有聲息令一面出戰一面來
報如無事則至黃昏後由北撤歸慎無使之知覺
又遣侍衛伍什率鄉導覓有水之地伍什馳至一

平山即見一泉下流六七里水甘而甚大大軍
兵馬可足一夜之用回奏

上大喜亟往前閱立營掘壕之地明示各旗遂駐蹕西
巴爾台

諭護軍統領托倫蘇丹等曰明日駐扎地方朕親身
指示駐扎各將行李須跟隨兵後結隊而行切勿
零星散走又

諭衆等明日黎明著各炊飯食畢起程中路督運于

成龍報稱直隸第一運郎中噶禮米一十石第
二運遊擊劉澤寰米四百石第三運都司丁延
祥米六百石第四運按察使劉皚米七百石第
五運編修宗大業米七百石第六運叅領陳鏐
米三百六十石原任知府于漢翔米八十石俱
已過第十五站格德爾庫地方現在第七運郎
中索爾壁米六百石第八運候補知府祝鍾俊
米六百五十石俱於初四日至第十四站之和

爾和地地方山東省第一運員外郎碩色米六百
二十石至第十二站之蘓勒圖地方後運山東
河南兩省之車輛侍郎李鈞左通政喀拜督催
陸續而來又郎中噶禮報第四運夸蘭大劉體
從和爾博驛將米七百石麵八千觔以駱駝馬
騾馱載於四月十六日起程五月初五日至第
二十三站西巴爾台地方初六日自西巴爾台
起程前去

命彭素克格隆隨中書阿必達往諭噶爾丹時中書
阿必達等賫

勅往授噶爾丹還奏曰初六日清晨臣等未起行之
前厄魯特千許人來截前鋒營外馬驅之而去

臣等急捧

勅書至前鋒排列之地侍讀學士殷扎納侍衛夸色
亦與臣等前進往說厄魯特而厄魯特近薄臣
等竟不通問奪去馬匹使臣等步行臣等回至

前鋒營取賞噶爾丹之衣幣果品負於駱駝之
上臣等進覓噶爾丹踪跡遇厄魯特二十餘人
伊等謂臣阿必達曰使臣請回已於前使口中

聞

聖上親統大軍而來之實音乞

聖上大兵暫停倘或即來則我厄魯特震懼我噶爾丹
在土喇地方不在此處往返須數日乞暫緩師
若即來薄我我當避去若必窮追我亦能拒乞

使臣代奏

聖上今請畱一使於此

聖上勅書已連夜送我博碩克圖汗矣俟覆本到當付所留使臣贖回今令汝還恐中途遇我國之人妄行邀劫我等發哈什哈二人送汝歸去遂給臣身及家僕二人又多禪僕人二人坐馬五匹兩哈什哈率十餘人帶弓刀持烏鎗送臣等來至燕圖庫列圖地方遠見我軍之形伊等乃返

上諭阿必達曰噶爾丹處爾魯一往今復差汝汝若獨
行噶爾丹之人亦不汝信札薩克喇嘛彭素克格
隆告請効力故遣與汝偕行

諭彭素克格隆曰喇嘛爾可與中書阿必達今晚宿
於前鋒營中明晨往赴厄魯特宣朕之旨爾等若
果富足豈盜我前鋒之馬乎惟不足之故乃竊取
耳雖取馬百匹亦不汝責汝等勿懼而走務追及
偷馬之厄魯特宣朕旨而歸阿必達等請帶鄉導

上曰爾可帶撥什庫諾爾布前去告厄魯特云朕此來
乃為諸蒙古不得安生之故非必欲殺汝等也今
汝等欲我緩兵我師在此地乏水明日到克魯倫
河後當再緩行其以此明告之是日密

諭大小營中大臣等令安扎營壘如故而營內盡撤
去帳房卽

御用行幄幔城亦俱不設各處皆伏兵空壁以待之抵
暮

上親巡視營伍

癸亥

上親追噶爾丹向克魯倫河前進時

上以克魯倫河乃噶爾丹至要必爭之地賊若欲戰必

於克魯倫河拒戰矣乃將兵分布隊伍

躬在前鋒前行

上於途次率數人登高執圓鏡遠望見河不見人形

上待後軍坐於高處見東有額爾德尼拖羅海山西有

山麓從巴爾代哈迤邐接河岸隱見不真

上諭科爾沁上謝圖親王沙津達爾漢親王班第喀爾

喀車陳汗納木扎爾王西第什里貝勒益楚克貝

子曰汝等各率汝屬下蒙古十許人往據西方巴

爾代哈山麓高處佯作全軍從此經行之狀敵人

來犯勿與之戰誘之前來敵若有備則大兵爭先

據河阿必達遣撥什庫諾爾布還報言臣等到前

次追見厄魯特之地視之厄魯特皆已去矣臣

等追躡又行數里至克魯倫河有厄魯特七人
望見我等卽遡河馳去又視馬矢似遁去二日
故阿必達及喇嘛遣我還奏伊等仍追踪去矣
駕先抵克魯倫河見無賊寇河北界有賊安營之跡賊
去未久

上顧左右諭曰向言噶爾丹熟練戎行攻拔西方回子
千餘城收服四厄魯特殺其兄弟全滅七旗喀爾
喀所向無敵今觀其不據克魯倫河拒戰則其怯

懦顯然所言有俄羅斯六萬亦偽也今我軍不復有與戰之期但追之為急耳於是俟各隊領軍大

臣畢至

上謂諸大臣曰噶爾丹若於克魯倫河拒戰我兵奪河交戰猶稍廢力今觀其不於此拒戰而竟逃竄噶爾丹於行兵之道一無所知是自開門戶以與我也除此地外於他處斷不能拒我軍審其情形未必駐扎他處必連夜逃遁矣當輕騎急追之諸大

臣奏曰此與

聖明所豫料者一一相符合也是日

上駐蹕額爾德尼拖洛海克魯倫布隆乃設哨卒南向
巴爾代哈北向達爾幾爾濟口生古爾口東向
額爾德尼托羅海西向克魯倫河上流內又立
八旗防衛

上顧前鋒親隨侍衛喀瓦爾達曰明日擒敵一哨卒獲
其生口則有實音矣正商擒之之法統領碩鼐擒

一厄魯特至問之言

天使到後我噶爾丹尚不信

聖駕親來云

皇上不在中國享安樂而飛渡此無水大沙漠乎及向
釋回四厄魯特逐一問及黃帳布城網城進止
方信是真今日親身至北方孟納爾山立觀大
兵營中見行列規模大驚曰是兵從天而降耶
此無水之沙漠不知

聖上率如許兵衆如何行路此兵不比烏關布通之兵
極其精鍊我等難以脫免惟乘夜遁走可幸得
生耳不則死於是兵矣遂傳令衆人欲盡棄廬
帳器械乘夜逃去

上命賜所擒厄魯特衣服使撥什庫諾爾布追送與兩
使臣又遣喀瓦爾達往額爾德尼拖羅海探視
有無賊寇

諭內大臣索額圖曰車陳汗喀喇沁王札西奏厄魯

特噶爾丹不能抵敵皇威已經逃竄願帶臣等蒙
古兵追勦伊若抗敵即行奏聞以俟大兵伊若逃
竄即隨後進勦以掠其妻子此事關繫重大著會
議具奏隨議王扎西所奏甚是但今遣去若兵力
微小恐致危險

聖駕親臨又不便分兵以重勢遣往自明日著往塔爾
吉而即僧枯爾河地方躡尋踪跡如是則可得
的信王扎西仍令遣伊兵追趕尋踪偵探的信

奏入得

旨俟明日再行斟酌又

諭大學士伊桑阿曰我兵甚勇器械整齊又遵法度
無可議處止兵丁僕從人等一切宜加意謹慎毋令
懈弛致煩朕慮將此著徧傳八旗以至僕從人等
通行曉諭

上諭皇太子曰我師以初五日發拖陵前進初四日即
遣公主長史多禪中書阿必達賚勅諭與噶爾丹

令阿喇布灘喀瓦爾達等二百人與之偕往朕會
訓之曰汝等勿至克魯倫河觀地方情形古爾班
圖爾漢巴爾泰喀等處敵人恒駐有哨兵汝等往
克魯倫河乃紆曲之道彼必來截汝後惟從顏土
庫烈圖地方即將伊等遣發未遣發之前將我軍
所獲厄魯特四人縱之使去令其傳信我使臣相
繼而往乃伊等於初五日徑抵克魯倫河以未見
敵哨踪跡意謂哨兵已去疎於防備厄魯特人從

山巔見之於初六日黎明時厄魯特近千人將馬羣堵截驅逐馬羣中護軍及跟隨人役將厄魯特人射殺仍驅馬羣回營我兵整齊排列放鎗殺厄魯特數人我兵雖有數人為厄魯特烏鎗所中因綿甲皆未透惟一人微有傷痕時喀瓦爾達令我兵且勿與戰勅諭事大務期必達為善令侍讀學士殷渣納與厄魯特人俄七爾偕往彼即將丹濟喇之馬挽住云此乃聖主遣來使臣不可加以無

禮於是俄七爾將彼蒙不殺之恩賞賚遣回及聖
主親臨將軍費揚古從俄而渾土喇順下流而來
告之丹濟喇失聲驚恐即領受勅諭收兵急去喀
尾爾達等亦收兵而回於初六日申時到初七日
駐蹕於庫烈圖西巴爾台布喇克地方中書阿必
達從厄魯特營中來奏厄魯特人之言大聖主請
稍緩師若即來我等甚懼我主今在土喇地方往
來必需數日求少待之初八日早一面向克魯倫

河進兵一面仍遣阿必達盆蘇克格隆往諭彼曰
汝等勿懼惟議和好耳我師不駐克魯倫河則水
泉不給遣去後遂抵克魯倫河河之兩岸皆山
大概多險峻而少平坦河亦甚小較之南苑中河
差大耳是日厄魯特處處哨兵皆見之不知其實
在何處今我師相機而進彼宜於我師抵克魯倫
之日迎而拒之不以河與我而戰為是乃即令河為
我有其庸懦誠可見矣向後情事俟再報將士志

氣皆奮勇精銳恐汝等在京懸念急示知之可於
皇太后前奏聞大學士滿尚書等咸令觀看特諭

甲子

遣大學士伊桑阿致祭克魯倫河之神

上以統大軍臨克魯倫河於是遣大學士伊桑阿祭其
神文祝曰朕統御寰宇懷柔百神遐邇內外固有
殊視凡乘輿巡歷之地必虔告所過名山大川所
以昭秩祀也頃因厄魯特噶爾丹悖德逆天俶擾邊

境朕躬統大軍遠出聲討以期殄寇安民茲已行
次克魯倫河惟神夙以巨浸名於絕塞溯長源之
濬發引千里之衆流朕率師涖止臨觀嘉嘆是用
備陳牲帛遣官申祭神其丕彰靈應默贊軍威迅
蕩滌夫穢氛永澄清乎朔漠異日垂諸史冊蔚有
休光惟神鑒焉

皇上親率前鋒兵窮追噶爾丹噶爾丹倉皇遁走是後
數日沿途大獲所遺器械帳房食用等物是日

上距克魯倫布隆駐蹕十八里地方甫到即傳

旨著各營合為一大營日間將馬於營外牧放夜間於營內牧放於是馬皆得飽而昏夜復無遺失之憂誠至計也又

諭內大臣等及大學士伊桑阿曰明日路程稍遠將帳房行李乘早馱載豫備完畢欲行即行著僕從人各近伊主行走若遇戰時令僕從人稍後如此齊行凡事俱善况今日得遺失馬百餘匹非皆兵

丁之馬乎朕若遇此等人必即行正法決不姑貸
須加意謹慎馬匹著將此徧行嚴諭八旗又

命留步兵於後輕騎進巴顏烏闌進勦噶爾丹時厄
魯特逃人來言噶爾丹初不信

御駕統軍而來及兵馬爭渡克魯倫河分隊而進厄魯
特哨卒俱被逐散言進克魯倫河之兵計有三
隊不知幾萬遂爾驚動下人言曰

皇上不好殺戮陣獲之人尚賜衣放回吾輩隨噶爾丹

何日爲了期無不嗟怨欲來降者多又厄魯特
降人言

皇上親統大兵已到克魯倫四路大兵亦到噶爾丹隨
即遁去

諭內大臣索額圖曰今日據投誠厄魯特人言聞朕
親率大兵而來四路竝進噶爾丹即行逃竄朕若
率綠旗步兵前進則牽綴遲悞朕意揀選綠旗馬
兵會合大將軍費揚古向巴顏烏闌追勦噶爾丹

其綠旗步兵應留大臣管轄著隨後緩行前來滿洲兵每旗畱二十名應派章京護軍校管轄綠旗步兵著全留宣化府取來砲二十四門亦著留下漢軍砲十六門能帶則盡帶往若不能帶著留砲一二門所留之兵應派賢能大臣一員統轄克魯倫之克勒和朔地方去此地一百三十里朕作二日程前行到彼所留兵丁著作四日程前行到彼擡鹿角兵有不能到者著漢軍大臣等酌量調撥

帶往前去大學士伊桑阿為派大臣管領所留之
兵開列領侍衛內大臣以下副都統副都御史
以上職名入奏得

旨內大臣阿密達著克將軍副都統胡什巴沙濟左
副都御史阿山著為叅謀令從此分四日至克勒
和朔若有調遣著酌量趨行前來

命放馬於大營內

上諭內大臣索額圖曰今晚將馬匹俱入大營內牧放

若有將馬於營外牧放被拿獲者將廝役及伊主
一併正法著將此通行嚴諭八旗是日喀爾喀扎
薩克一品台吉齊旺巴爾珠爾旗下僧格佐領
下驍騎杭吉代聞知

皇上親征前來進馬六匹奉

旨彼繫小人前來進馬甚屬可憫著照良馬例加賞
於是厚

賞杭吉代

復遣中書阿必達賚

勅往諭噶爾丹中書阿必達還奏曰臣等本月初七

日晚附近前鋒營宿次日黎明起行至厄魯特

盜馬之地見厄魯特皆已遁去躡踪追至克魯

倫河見有七人望見臣等隨向河上流而走又

視厄魯特馬矢去似兩日矣乃遣諾爾布以此

事回奏

皇上臣等循克魯倫河而上追一日夜有燈火光見克

魯倫河岸有馬二匹近往視之地上棄烏鎗一
桿涯下一人匍匐而行執之問曰爾係何人在
此何為爾噶爾丹今在何處其人言我乃伊喇
古克三庫圖克圖之人吾名庫濟欲來偷爾軍
中之馬故我厄魯特共十餘人來盜馬而去我
兩馬俱乏故獨留在後我衆夥昨已棄我去矣
至噶爾丹本身則率兵往克勒河朔云

上諭阿必達等曰著以爾等所擒厄魯特庫濟為鄉導

賫勅前往授噶爾丹爾等東驛而往酌携乾糧仍帶撥什庫諾爾布同去爾等見噶爾丹行踪即遣諾爾布回奏爾等徑入朕駐此待爾等三日隨以蟒袍及馬一匹

賜所擒厄魯特庫濟

諭阿必達等曰爾等往傳諭厄魯特云朕在途中蒐獵遇河捕魚恐厄魯特聞朕統軍而來倉猝遁走朕非來伐之也朕斷不伐汝欲與汝議約而來耳

汝若不懼親身來議懼則於丹濟拉丹津俄未布
杜噶爾阿喇卜灘內遣一二人來議不則於寨桑
內前曾克使為朕所識者遣一二人來使之定議
則善矣汝勿遁走如或遁走則事不能了而汝身
與下人俱敝朕塞上居人亦不得安爾等追三日
如不能及即回可也於是

諭噶爾丹勅授阿必達等令之起行

勅文曰朕以仁御宇內養育羣生惟禮義是尚以祈

天眷是以昔曾發勅諭汝盟議爾又以生計極艱
極窘不能前赴為辭於是朕一切侍備來至克魯
倫河欲與爾會盟使之永安度日抒我誠心朕與
汝覲而定議汝仍照舊職貢貿易則汝下人得以
寧居而朕邊民亦得休息朕斷不愚誑他人汝勿
疑懼汝若疑懼避去則事無了期而朕種種美意
皆虛矣近遣我使偕汝向日克使朕所識認之人
前往令五日內遣回特使費賜汝銀幣以公主司

儀長多禪中書阿必達為使不知汝國人受我使
否得至汝所否朕使又不獲聞汝之言是以又特
遣扎薩克喇嘛彭素克格隆仍以中書阿必達為
使朕今已到克魯倫河爾其反覆熟籌之或會盟
或另議作速遣使來告不則爾下人未必盡如爾
心爾未必安枕也爾當細思隨遣使來復朕用是
抒結好之心賞賚汝馬疲落後之人使之引導遣
至汝所特諭

諭皇太子曰因噶爾丹逃遁特示知之初九日早我軍中遣拿活口之新滿洲擒厄魯特一人至問之彼云因我馬疲乏衆人棄我而去我言汝等不挈我往我食已乏今將殺馬以食衆言汝勿殺馬但急隨我等踪跡前來言畢而去等語朕於是賞賚之令同喇嘛及中書阿必達偕往辰時從厄魯特逃來人云噶爾丹始不信皇上親統兵至昨見軍據克魯倫河分隊進兵彼處處哨兵俱被追逐皇

散逃奔皆言向克魯倫河兵三隊不知數萬已抵克魯倫聞語遂爾潰遁其衆私相議曰康熙汗性不嗜殺於陣前擒獲之人皆賞以衣服而遣之我等從噶爾丹何所底止因大相怨恨欲投誠而來者甚衆觀此則噶爾丹逃遁是實費揚古之兵當前堵截我師追隨於後荷

上天之眷佑成功大概可測矣故報京師知之可於

皇太后前奏聞宮中亦令咸知正在軍中倥偬之際未及

詳悉書來為此特諭

乙丑

上親率前鋒兵窮追噶爾丹獲厄魯特人言噶爾丹逃
往巴顏烏闌入樹林內尋險固之處棲身

駕次扎克寨阿必達使撥什庫諾爾布還報曰諾爾布
隨阿必達等到克勒河朔見厄魯特下營之地
盡燬其廬帳棄其什物而走臣等緊隨其遁跡
前往遠見有一人中書阿必達令諾爾布拘之

問噶爾丹已到何地其人言我乃喀爾喀自己
顏烏闌逃出今已兩日矣不知噶爾丹今在何
處我聞

聖主收養窮人故逃來投降為此解其人來奏阿必達
緊隨厄魯特踪跡前去矣

復遣大喇嘛垂喇克查木蘇格隆賫

勅往諭噶爾丹

上諭垂喇克查木蘇格隆曰茲遣爾賫勅往諭噶爾丹

爾其以勅書賜幣追及噶爾丹授之言我聖上竝
非來勦但為衆生來與爾定約耳

皇帝勅旨諭厄魯特噶爾丹博什克圖曰朕惟治道原
期有益羣生朕親統大兵欲與爾共議俾羣生享
其利益故至此與爾相近之處兩次遣使其到否
未知爾何竟無一次遣人來也朕為天下大一統
之主斷不肯欺罔人而行已經屢頒諭旨爾仍不信
逃遁而去朕視爾所逃之路將兵仗器皿盡皆拋

棄爾所屬之人乞降而來者甚多爾生計迫蹙朕
所深悉爾前此奪朕使臣之駝馬令其步行而歸
今次又劫朕使臣之衣併奪隨行之人駝馬朕皆
不介意將爾逃去遺棄疾病之人與來歸之人盡
皆收養朕若實存戰征嗜殺之心豈肯將爾所屬
之人收養之理爾仍不信遁去朕西路大兵已至
巴顏烏闌朕親統大兵至克魯倫河諒爾亦必知
之黑龍江盛京寧古塔等處大兵今皆會集於克

魯倫河再斷爾歸路之大兵亦已至厄嫩巴爾查
地方爾即欲遁去安可得乎朕不忍生靈之塗炭
故復遣使前來爾可將丹濟拉丹津俄木布阿拉
布灘三人中遣一人前來朕非欺因而行彼自可
見爾仍疑而不信將所屬羣生塗炭爾安忍坐視
之乎否則爾所屬之衆悉皆散而歸朕爾豈得晏
然而已乎朕言出至誠爾猶不信日後雖悔無及
朕以道法為念故遣使前來竝不欲將爾剿滅出

自誠心賜爾緞十疋著大喇嘛垂拉克查木蘇格
隆為使前去爾試反覆思之若欲免生靈於塗炭
而來歸順可於丹濟拉丹津俄木布阿拉布灘三
人中速遣一人來為此特諭

聖祖仁皇帝親征平定朔漠方略卷二十三

欽定四庫全書

聖祖仁皇帝親征平定朔漠方略卷二十四

丙寅

上躬率前鋒兵窮追噶爾丹噶爾丹遁大獲其遺棄甲
冑併所奉金佛經卷等物是日抵克勒河朔駐
蹕

遣人探西路大軍聲息

上諭大將軍伯費揚古曰前曾兩次遣人馳書賜大將

軍伯費揚古其至與未至並未奏明商南多爾濟
至始知西路兵於五月初可至土喇初七可至巴
顏烏闌於是又遣人賜書至今仍無音耗朕親統
大軍追勦噶爾丹問所獲噶爾丹之人及阿拉布
坦之人言於巴顏烏闌之西曾聞砲聲不知與何
兵交戰而其事又未知若何因爾奏未至朕深以
為憂故遣蒙古鄉導持書馳往偵探信息人到時
爾即繕疏著一曉事人責來

命將軍阿密達駐劄克勒河朔

上諭議政諸臣曰比者三日見噶爾丹盡棄其老弱日用諸物而遁其去之狀甚急今我選兵追之將重砲留於此站每佐領留護軍一名看守兵部隨以統領大臣奏請得

旨著阿密達率兵前來於克勒和朔駐扎此處所留之兵令其一併統轄或召使前進或遣令先回俱候旨行

申嚴押護輜重班次兵部以驍騎校西代等防護
輜重曠班擬罪具奏

上諭曰哨探防護之兵所闕甚要各營諸王皇子大臣
俱宜知悉大臣等既輪班行走此後若稱不知將
諸王皇子大臣等一併議處

上諭皇太子曰初九日將暮分派兵隊前往追逐初十
日抵噶爾丹所住之地觀彼形跡亦不甚衆馬雖
有而不多牛跡甚少羊跡亦少有之帳房奎鬻及

稚子婦人所用之物鐵器鎗柄網罟帳房椽桿以至釜中之羹盡皆棄之而遁跟隨人役拾取者甚夥觀其生業可謂窮困至極矣師行之際自厄魯特投誠而來者相繼於道咸云噶爾丹住此地阿喇卜灘住於巴顏烏闌噶爾丹初不信皇帝親統兵至此於縱回厄魯特四人問此無水之地何由可至答云我等隨行聞其不待尋覓水泉但皇帝所指有水之地羣往掘取掘未畢輒水泉湧出咸

足給用又我師進克魯倫河之日跟隨人於草間遺火焚燎向古爾班圖爾漢之地厄魯特人見之云康熙汗將火與兵齊進誰能抵敵即令其衆帳房輜重悉焚棄之身先逃遁衆厄魯特咸訕笑之曰始因何而來今因何而遁又有自阿喇卜灘處逃來者云阿喇卜灘在巴顏烏闌噶爾丹中夜傳來告以皇上親至阿喇卜灘云汝乃無眷屬牲畜之國我乃有眷屬牲畜之國滿洲兵誰不稔知我

斷然不與之戰遂棄之而回未至之前阿喇卜灘
之衆半皆離叛尋又聞西路大兵砲聲厄魯特皆
倉皇潰遁不知所措至於大亂今汝等追兵於來
日日中當可追及其後隊牛羊矣朕於是周詳謀
畫期出萬全決不輕易朕所統之兵盡皆整齊驍勇
馬悉肥壯觀厄魯特之馬如我軍下等馬者有之
我軍未至克魯倫河之先旱甚草未萌出聞此數
日來草皆茂生未知果否我軍逼臨賊境每日懼

躍凡大小臣工以至跟隨人役喜悅不可勝言喀爾喀等亦因以奮勇言我等從前視厄魯特人馬精壯今隨皇大兵來此觀厄魯特之形貌舉動較我等奴僕之下更不及矣皆願效力哨探擒拿活口因闌入網城泣告求往由此觀之人心惟在於鼓舞節制洵不虛也凡在京之人焉能知如此喜悅故於少暇時將始末情事大槩彙括書遣示之可於

皇太后前奏聞并宮中及滿大學士尚書內大臣侍衛等
咸令知之伊桑阿想亦有信至特諭

丁卯

上躬率前鋒兵窮追噶爾丹噶爾丹將器械甲冑帳房
及臥病稚幼盡皆拋棄乘夜逃遁路獲一老嫗
詢問言厄魯特之衆倉皇潰散彼此交怨沿途
自相戰鬪有

旨檄知阿密達厄魯特今已潰散著將營伍馬匹牲

口日夜謹慎防備是日

駐蹕拖訥山海綏爾哈圖之東

酌議班師迎糧

上諭內大臣索額圖曰厄魯特噶爾丹逃竄已遠沿途潰散人亦不衆今應選兵裹糧躡跡窮追官軍米糧所闕甚重今兵丁所帶八十日口糧日期將滿于成龍所運米尚未到若大兵前進則距所運米太遠回時糧餉必至窘匱應使大兵迎糧而還朕

備有牛羊斷然不致缺乏西路大兵亦由中路來
料理糧務甚要著議政大臣等議奏

命領侍衛內大臣馬思喀為平北大將軍領兵追剿
上諭曰朕今日踹賊踪跡及問所獲之人言厄魯特噶
爾丹狼狽驚惶內自潰亂亡命奔逃量已至巴顏
烏闌矣若我全軍追趕似不能及應選兵輕騎追
逐除喀瓦爾達所領前鋒二百外其餘前鋒盡行
派出滿洲火器營兵及親隨護軍亦盡派出著追

至巴顏烏闌過巴顏烏闌以北不必前往昨所發
大砲八門及滿洲漢軍馬匹所載之砲盡行遣發
應派出大臣率領前去著將大臣等職名即行開
列具奏其叅謀大臣無庸多遣人多則反致煩雜
諸王等所屬之人若自有二十日糧不用官糧者
亦令同往其同回之兵但留其至拖陵所需五日
之糧將餘糧收取著各旗大臣親驗給與前進兵
丁議政大臣等列大臣等職名啓奏奉

旨著領侍衛內大臣馬思喀為將軍給與平北大將
軍印都統巴渾德齊世護軍統領鄂克濟哈為叅
謀都統都思哈爾石文瑛王永譽噶爾馬李正宗
護軍統領蘇丹蘇赫桑格副都統達禮善莫洛渾
齊蘭布孫徵灝渣喇克圖雷繼尊孫渣七費揚固
禪布喻維邦巴賽等令其隨征閒散宗室哈爾薩
副都統張所知亦著隨行

臣謹按兵者國之大事平居則足食師行而

糧從是以籌畫軍餉為第一急務

皇上念大兵出塞征討需餉浩繁輸輓之事關係尤重
特簡于成龍總轄運務既全備車騎使飛輓不滯又
足給官兵俾防護有資並以行止之節巡警
之宜及酌量措置之方周詳指示于成龍等
不能遵

皇上之訓誠轉運稽遲致逾限期顆粒不到官兵幾至
匱食

皇上仍前追逋寇務期勦滅至數日後度米勢不能至
倘再深入兩路之兵會集一處需糧益多大
軍必致窘乏乃分兵均給所存之米交將軍
馬思喀窮追噶爾丹

聖躬親統餘兵迎回催趣又遣管駱駝首領官郝善圖
驅駝馬馱運米糧西路官兵始得飽騰言旋
以此觀之將帥能遵

旨而行者無不成功違節制者無不僨事

聖明廟略真臣下所不能及萬一者也

諭皇太子曰自前旨諭汝之後於初十十一十二此
三日前進窮追其潰竄狼狽之狀總不堪觀婦人
稚子悉自殺戮棄之而去獲一老婦生口問之云
其部落自相攻殺重被傷殘晝夜奔逃已前去四
日由此觀之其去蓋已遠矣若費揚古兵得及堵
截此賊決不能脫若更愆期噶爾丹或得乘間遁
去然此賊膽已喪落斷不能存永永敗絕矣我師

欲悉往追逐八十日之糧已盡萬一為軍食所窘
我如許全盛而至官員軍士已奏成功為何因此
逋誅殘寇致重困我師職此之故與諸臣僉謀公
議前抵費揚古之師以追擊之不及則還酌量簡
選士馬遣發前往此於伊桑阿所報之外特頒諭
旨咸令聞之朕於十三日凱旋啓行朕躬安好恭
請

皇太后慈安諸皇子諸王大小諸臣以至軍士皆佳以我

全師歡欣愷樂風聲所至克敵摧殘此皆
上天仁愛俯垂協應也幾務至多無暇詳及此進
皇太后慈覽宮中並使聞知特諭

戊辰

上視平北大將軍馬思喀啟行統軍回鑾

上諭馬思喀曰爾等以五日程追至土喇然斷不能及
也今噶爾丹已極殘破朕所目擊彼決不能復來
但當於行止小心防護耳西路兵乏糧已久今朕

速回拖陵兀所到米不支給御營軍取道急發土
喇以濟西師俟後隊米到量撥數日糧陸續催趲
致汝軍中是日

駕至克勒和朔駐蹕內外諸王貝勒大臣文武各官至
行宮東門跪奏曰厄魯特噶爾丹肆行暴虐剽掠臣
服我之喀爾喀車陳汗

皇上親統大軍出塞征討一應調遣糧餉營壘斥堠等
事俱重煩

聖慮籌畫周至噶爾丹震悚

天威望風鼠竄

廟謨駿烈超越往古今日事成回軍甚屬大喜臣等

請行

慶賀禮傳

上諭曰朕自出師以來惟欲前進並不退却一步或因
駐蹕之處稍有未妥欲退回數步安設行宮朕亦
不允今大將軍費揚古兵稍遲想亦將至巴顏烏

闡又給發兵衆糧米日期將滿六軍以糧餉為命
闡係最要凡此衆兵俱屬朕多方保全至此其中
若有一二人艱於粒食心實不忍故一面以馬思
喀為大將軍將衆兵糧攢足二十日給發令其追
趕前去扈從兵止留七日口糧一面領兵迎接糧
米向拖陵地方回軍西路兵及兩路米糧皆未完
備俱不稱朕本意朕猶有憾諸王大臣各官跪奏
曰大兵糧餉實係緊要向所期約之地糧餉不

至致有耽悞因此預防回軍極是

皇上天縱神武聞知噶爾丹所在輒

親在前鋒前行深入敵境噶爾丹魂飛膽落盡棄其

鎧甲器械帳房輜重老弱偷生夜遁軍威振於

遐荒大事成於俄頃臣等於此毫無躊躇之意

欲即行

慶賀禮

諭曰朕預料噶爾丹必遁已密諭費揚古等令截其

歸路今馬思喀兵又進巴顏烏闌兩路夾攻噶爾
丹料應難逃大事已成爾等欲稱賀良是但從征
諸王以下文武官員以上以至衆軍人等皆欲在
朕前効力奮勇交戰而不得一見敵以遂其意於
朕心猶有歉然著少俟馬思喀信息爾等勿固請
諸王大臣各官又跪奏曰

皇上神武天威噶爾丹望風狼狽逃竄

皇上又預遣兵截其歸路費揚古馬思喀等雖殄滅噶

爾丹亦由

皇上廟謨先定並非羣策所能與臣等祈

皇上俯慰衆心俞允稱賀

上諭曰馬思喀信息不久即到姑暫候之

藍翎侍衛殷濟納賚大將軍伯費揚古疏來覆
命先是

上以手勅遣殷濟納等賚送費揚古至是始以其疏至
言臣等率大兵於四月二十六日至杭愛山之

喀喇拖羅海口駐扎藍翎侍衛殷濟納等賫

皇上手勅至著留陝西兵於塞稜格路以遏噶爾丹之
逃竄仍令自領大兵隨後進發欽此臣等率領
大兵隨後進發外其將軍孫思克所領陝西兵
因來時途遇風雨馬匹遲悞前已奏

聞令選滿洲兵二千綠旗兵二千趨隨大兵而行若
留此四千兵於塞稜格以遏噶爾丹之逃竄則
兵勢單弱臣等仍依前所奏一路進發今已聞

噶爾丹順克魯倫河而下至達爾漢與喇地方
與

皇上所統大兵相近官軍無不抵掌歡躍俱欲速躡賊
後仰仗

聖主天威從其後擊滅之但臣等材既庸劣而大兵行七
十餘日牲口疲乏不能亟到伏乞

睿鑒存西路官軍畢生顏面

皇上稍緩師行費揚古又密奏言前運糧正卿喻成龍

等至_臣處言水草既闕牲口又直從太原來今
已疲瘦臣等令將十五日糧留貯喀倫其三十
五日糧以小車駱駝運送查得右衛兵所賣八
十日糧于五月初四日期滿京城兵所賣八十
日糧于五月十一日期滿前曾檄運糧大臣將
所運口糧乘此八十日口糧未完之前速行運
到而彼處回稱小車四百餘輛裝載米石於四
月初九日已自喀倫起程竭力趲行於北土堅

硬處一日止可行三十餘里沙磧岡阜處一日
止可行二十里若遇大風衝擊不能逆風而行
隨其所至天晚即宿所費八十日糧未完之前
不能運至大軍之處臣等已將駱駝七十餘匹
於四月二十五日自揆宿地方遣回迎取米石
令分留十五日口糧於喀倫將三十五日糧作
速運至土喇雖經移文尚不能趕及大軍乃因
路途遼濶馬力不及之故則土喇以北運送糧

餉益難趕及大軍矣今噶爾丹既在達爾漢與喇地方則臣等所率大兵不及待西路所運之糧但俟駱駝所載米既至之日量八十日糧一完即酌量撥給率此大兵前赴

皇上行在俟至

皇上行在後乞

諭運糧大臣將中路大軍之糧分給臣等所率之兵命侍郎阿爾拜賚糧隨大將軍馬思喀軍

上諭行兵部曰著侍郎阿爾拜留於此處俟劉暄等所
運米糧一千十九石麵八千觔到日隨平北大將
軍馬思喀兵前往

命公常泰為將軍統領還軍

上諭議政大臣等曰朕明日起程前途水少不能容八
旗應與大將軍馬思喀作為後勁之勢著滿洲兵
各以四旗一日起行其次著前鋒及八旗漢軍綠
旗兵一日起行此兵共留一大臣為將軍議政大

臣開列內大臣都統副都統等名銜入奏得
旨此番諸大臣內公常泰行事甚善著充將軍

命原任侍郎四格子赴大將軍馬思喀軍中大學士
伊桑阿奏曰四格子前因革職告請効力今發
兵前進應否遣四格子隨征請

旨定奪

上曰著將四格子交馬思喀有差往噶爾丹之事令其
差遣無則軍前効力

上諭皇太子曰朕因中路兵糧每日焦勞在念多方措
施皆得無悞而西路之糧甚為可慮非全力催運
不能有濟是以朕躬親率師衆迎糧而還樽節已
到之糧豫濟西師之用者正此意耳是日辰時五
色雲由東南而起遠望如樓臺亭閣之狀輪囷
離奇非煙非霧散成五彩總之

皇上愛兵恤民凡事上合

天心故

天示此瑞兆古所謂慶雲蓋卽此也

己巳

上自克勒河朔啓行侍衛額林辰等賫大將軍伯費揚

古疏至言五月初一日侍衛額林辰奉到

皇上手勅臣等欽遵

上諭當卽率大兵星夜前進但大兵行程遙遠牲口少
疲而噶爾丹自布爾察地方以前十餘站盡焚
有草之地是以遣人在前覓草地攢行臣等率

大兵仍亟於初三日至土喇以擣噶爾丹之後
但祈

御駕稍緩留臣等畢生顏面至藍翎侍衛殷濟納等四
月二十八日回時臣等曾以陝西兵不便分拆
仍作一路進及西路口糧不能追及大軍之事
開具兩疏付殷濟納等往奏不知殷濟納額林
辰到

御前者孰先故將前兩疏重繕一併奏

聞又一疏言臣等率大兵而行曾委衆扎薩克在大
軍兩旁稍前躡探五月初一日正行至半途喀
爾喀蘇泰宜爾登公遣其子陳盆台吉來報有
厄魯特男婦十餘人過南往西去矣即以前鋒
一隊授署前鋒統領碩代追至十里許獲婦人
五口童稚八口馬十二匹駱駝二頭有犢乳牛
三頭羊及山羊十五隻其男子三人走趨山中
追五十餘里盡擒之間所擒厄魯特朱爾布等

據稱我等皆阿喇卜灘之弟丹巴闌之人隨噶爾丹下克魯倫到肯特山我主待我不如前是以逃回欲捕捉禽獸為生聞前者曾求援兵於俄羅斯國前月俄羅斯使者二十餘人來約至青草出後助烏鎗手一千及車裝大砲發至克魯倫東方界上所差使者尚未歸噶爾丹聞聖上大軍來故由克魯倫而下以赴俄羅斯援兵之約我等小人聞之傳言如此謹奏

上在途次於馬上聞之喜向衆大臣曰費揚古之兵於
初三日已至土喇彼曾云懇祈聖恩稍加寬緩若
不因等待伊等而行今且早已竣事回師矣朕統
大兵追逐五日若再前追噶爾丹當為朕所獲因
不得費揚古兵消息兼之于成龍所運之米又不至
故湊米與馬思喀之兵遣往追逐朕即統軍回而
迎糧今費揚古於初三日至土喇則於朕本計相
合噶爾丹諒必不能竄去矣內大臣國舅佟國維

大學士伊桑阿奏曰

皇上所籌無有不合所料無有不中

上適言費揚古聲息今日必到佇待再三而費揚古之

信果至

先見之明何其神也費揚古之兵誠為大幸

皇上親追賊寇賊勢已極窮困費揚古等至彼竟可立

奏成功矣

上曰費揚古又曾請糧於朕朕念我兵之餉所繫至要

而西路之兵又必至糧餉困乏因預給駱駝首領
郝尚圖以駱駝騾匹令將頭運噶禮所運之米盡
行運至已給此處兵丁又著將次到劉暄宋大業
所運之米不可支動令迎接西路之兵即行給與
今軍餉無復憂矣但先曾與于成龍言定八十日
之內不用彼米若滿八十日時始用彼所運之米
將彼米運至土喇以備向北進征之用今于成龍
所運之米不但不能到土喇即克魯倫地方尚未

到顆粒豈有遲悞如此者乎佟國維伊桑阿等奏

曰若

聖上未及周詳籌畫不但費揚古兵即此處大兵亦必

甚至缺乏于成龍之米果屬遲悞

駕至塔爾渾柴達木駐蹕

上大將軍伯費揚古前後奏章傳示諸大臣

諭議政大臣曰彼不將西路情形早奏而朕遣侍衛

由捷路往詢乃留之如許日始令來覆言西路絕

糧請撥中路之米違期三次此等事朕已洞悉俱預籌之矣今此䟽到汝等皆見以為何如衆咸奏

曰

皇上預籌已定雖兩路之糧稍有遲悞兵丁僕從無一人窘乏反移中路之米撥給西路調度多方臣等不勝欣忭

上諭曰御營內官軍除有糧五日以外者不查外其有一二三四日糧者幾人及竟無糧者幾人著察明

具奏又

諭曰大將軍費揚古疏著抄送大將軍馬思喀并諭云費揚古之兵今已至巴顏烏闌爾其儘力速往協勦窮寇朕親往拖陵料理爾等兩路軍餉事務今又交待郎阿爾拜米一千餘石麵八千觔令運赴爾等軍矣

命內大臣明珠駐克勒河朔趲運米糧

上諭議政大臣等曰諸務俱畢但西路大軍來會需米

甚急應多撥上駟院馬併發所餘騾匹朕營內大臣並後營諸王以下官員等有情願捐助者令捐助馬匹牲口俱交運糧官作速運到著會議具奏隨議

上諭誠是應將上駟院馬匹及所餘騾子發出再曉諭御營官員及後營王以下官員等有情願捐助馬匹牲口者將數目送到之日交運糧官速行運送併移文左都御史于成龍其所管情願効

力官員內量所有馬匹牲口取交運糧官員作

速運到

上曰今牲口疲乏之時雖使捐助其能幾何可以內廐
駱駝三十頭馬一百匹發給移文于成龍路途遙
遠可留內大臣明珠往克勒和朔地方駐扎糧米
隨所到即著駝馬幫運未至糧米令頻行催促
其劉暄給以才能鄉導一名從朕來路而去明珠
既在克勒和朔地方駐扎著不時偵探賊寇消息

上諭皇太子曰伯費揚古兵已過土喇將噶爾丹去路
盡皆堵截特示知之十四日朕所遣布庫殷濟納
新滿洲護軍奇雅楚鄉導波羅等至奏云伯費揚
古之兵於初三日已過土喇將噶爾丹所必由之
路嚴密堵截以待之精銳驍勇之兵一萬四千人
已到其地後隊又相繼而至馬之肥壯雖不及朕
所統兵然亦甚健朕聞之拱手向

天再拜朕之微介於懷者惟此耳今可永遠廓清矣但接

續聽報噶爾丹消息賊之情形已余在目中朕今
惟舒懷喜悅經理糧餉接濟朕躬何以致斯福祐
克稱所懷此皆

祖宗默祐

天地眷顧之所致也朕在此不勝懼欣踴躍此二三日間
即有成功捷報以此於

皇太后前奏聞宮中以及滿洲大臣侍衛等咸令知之特
諭朕班師移營已二日在拖陵布喇克駐蹕數日

亦未可定此書寫於駐蹕他爾渾柴達木之地斯
處水泉稀少朕躬自鑿井帷幄既設寫此書甫畢
大雨傾注水遂足用朕復向

天拜手以謝

庚午

命後軍分站緩行

駕至顧圖爾布喇克

諭曰由塔爾渾柴達木至顧圖爾布喇克地方甚遠

朕今日自塔爾渾柴達木來駐於顧圖爾布喇克
地方甚覺失宜遣鄉導波羅往後軍令其自塔爾
渾柴達木來宿於布黨圖地方自布黨圖來宿於
顧圖爾布喇克地方將此遞行傳諭後隊之兵

命晨炊早行

上諭內大臣等曰馬已疲瘦僕從人俱係步行若行李
早行則得早至著乘早起行若禁舉火恐行李到
遲不及炊飯著免禁舉火今日陰晦德勒素草甚

多令割取預備帶往其通行曉諭內大臣明珠奏
曰前因劉暄米車遲緩故以駱駝馬騾運至今
應將在後陸續運來米糧交與于成龍將所管
効力人等牲口並伊等預備牲口馱米運至
上是之

大將軍馬思喀奏報西路捷音是夜馬思喀報
至奏臣等十三日啓行行六十里許至渣喇地
方駐營隨遣人行文前鋒統領碩鼐令躡噶爾

丹遁去踪跡視所逃方向如後尾相近即酌量而行若有不可行之處作速遣報我即率兵隨至彼時又著新滿洲侍衛及蒙古王納木渣爾等於兩傍山躡緝並無別往踪跡止循克魯倫河逃去觀所住之處釜猶在爨拋棄帳房銅鈸及獵犬而遁為此奏

聞馬思喀又奏臣等於本月十四日至巴顏烏闌以南十五里地方遇前鋒往哨之喀瓦爾達帶得

投降厄魯特人奔第前來問其情由云噶爾丹
於特勒爾濟地方遇大將軍費揚古兵交戰噶
爾丹敗遁退回復列陣拒敵我軍步戰而前兩
軍對壘之際見噶爾丹兵散亂有奔竄形狀即
逃出投歸

聖主前來臣等會議著前鋒即行起程臣等率兵次於
額格木爾地方次日作速倍道前進又派選喀
爾喀納木渣爾王益楚克貝子十人令騎官馬

賈文前赴大將軍伯費揚古處將戰後情形開
明作速移文前來謹將投降奔第一併解送得
旨此事著作速檄知京城

上諭皇太子曰伯費揚古兵已將噶爾丹戰敗特示知
之十五日夜四更時將軍馬思喀奏章至稱臣等
于十四日距巴顏烏闌十五里追及前鋒兵探哨
之喀瓦爾達將厄魯特人奔第來問之彼云噶爾
丹於特勒爾濟地方遇大將軍費揚古兵交戰噶

爾丹敗北而退復列陣拒敵我師步戰衝突而入兩
兵正交戰時見噶爾丹兵有潰散奔敗之狀我遂
逃出投奔皇上等語并將奔第遣來問之奔第彼
云噶爾丹不信皇上親統兵至乃復驚駭恐懼日
禱於佛前雖欲慰輯其衆而不能人心遂大搖動
自見聖主兵威衆厄魯特私相謂曰康熙汗其速
來攻取我等似此生活有何底止交戰處噶爾丹
兵不及五千馬既極疲瘦又聞聖主追逐已近諸

凡器物盡皆委棄今雖遯去何以存活等語於是
即以所聞于五更時寫書馳示可於

皇太后前奏聞宮中及諸大臣咸令知之此後相繼報至
即時遣發特諭

辛未

上諭大臣侍衛及僕從人等朕望爾等駝馬匹善為
牧養勿致失棄一匹此番特為駝馬朕親行掘井
勞費心神之處皆爾等所知著通行曉諭衆執事

兵丁僕從人等知之

曉諭大將軍伯費揚古以接濟西路軍糧事

上諭大將軍曰爾于十三日擊敗厄魯特噶爾丹之事
據厄魯特降人奔第來告朕甚懌悅自五月初八
日朕先士卒疾追五日噶爾丹窘迫拋棄器械刀
鎗鳥鎗甲冑鍋釜帳房等物及羸病幼小乘夜遁
竄朕親率大兵追至拖諾山再欲往追因爾各路
兵會合不遠兩軍既會需米甚多糧必不繼恐至

缺乏糧餉關係重大量此窮寇以爾兵自西而來
此處又發兵夾攻即可勦滅於是朕統大兵回迎
糧米以內大臣馬思喀為大將軍授之大兵湊給
二十日糧隨以帶來牛羊遣繼爾後又趨運爾路
兵糧留內大臣明珠於克勒河朔地方料理朕又
給發馬匹駱駝充運糧之用其王以下大臣官員
幫助馬匹駱駝交與明珠將現到米糧陸續運至
汝軍朕帶回官兵於拖陵地方酌量稍給米糧俟

到喀倫給足前行運到喀倫米糧甚多爾將軍遇將
軍馬思喀將爾經行西路所有留下人畜應作何
派兵帶回使無他虞與馬思喀公同議定一面施
行一面奏聞爾親率餘兵由朕所行之路而來則
米糧必不致缺乏也

命黑龍江將軍薩布素留兵二千於索岳爾濟山餘
皆遣還

上諭議政大臣等駐扎索岳爾濟山地方盛京烏喇黑

龍江兵共六千名內留黑龍江兵一千名盛京兵
一十名著將軍薩布素副都統穆泰帶領駐扎索
岳爾濟山直至七月其餘兵丁令各回本處此回
去兵丁酌量其可至彼處之糧給發其餘米糧盡
撥給索岳爾濟山駐扎兵丁前曾有

旨留皇長子胤禔料理糧務至是傳

諭行兵部曰皇長子處所留大臣俱皆羸魯相應留
部院衙門大臣協理各營糧務隨將侍郎安布祿

等職名具奏奉

旨留常泰常綬松柱於皇長子處著協理糧務大將
軍馬思喀等復報西路捷音疏言臣等兵正欲
於本月十五日平明起程據噶爾丹部下丹巴
哈什哈遣阿喇善來降稱噶爾丹之兵於十三
日申時於特勒爾濟地方遇西路大兵交戰大
潰逃竄察罕西達里哈什哈同丹巴哈什哈帶
百餘人來降先遣我來明告統兵將軍及商南

多爾濟臣等會議若不使人往迎則或致疑懼亦未可知一面遣商南多爾濟附於前鋒一百名出前鋒哨口往迎一面臣等即行起程行至三十餘里商南多爾濟帶丹巴哈什哈等前來詢據丹巴哈什哈等稱噶爾丹聞

皇上親率大兵至此震懾

天威正在逃竄

皇上復躡跡窮追至拖訥地方選兵急擊噶爾丹聞信

窘迫奔逃遇西路軍迎戰大敗僅帶四五十人
逃去我因前為使臣來見

聖主時得蒙

恩卹故我同察罕西達里哈什哈各帶子女人口馬
駝等物來歸

聖主為此奏

聞

諭皇太子曰朕十六日駐蹕古土爾布拉克地方經

理回京士馬午後將軍馬思喀奏報伯費揚古兵
大破噶爾丹所倚任之丹巴哈什哈等率衆投降
我師等因將此奏報抄謄發去今大事已完朕惟
待大將軍費揚古奏章至拜

天以謝為此特頒諭旨可奏聞

皇太后傳知宮中及衆朝臣知之

壬申

駕至西拖陵大將軍馬思喀復報西路捷音言十六日

寅時奉到

上諭臣於十五日因投誠厄魯特陸續來降以致行路無多止行八十里次於工噶勞圖之口據鄉導云交戰之特勒爾濟地方去此約二百里臣等過此一夜明日可會大將軍費揚古兵矣為此奏聞又移文行在兵部言本將軍十六日平明啓行至十餘里前所遣喀爾喀十人回賫大將軍伯費揚古文來內言已遣阿南達往奏但阿南達皆

乘自備馬匹不能速到亦未可知將原文飛遞

願

皇上早聞捷音又言大將軍伯費揚古兵已回至塔蘭
布喇克地方我等行李亦止於文到之處等候
奏至得

旨著示議政大臣俟阿南達到時即得明悉

侍讀學士喇錫以降人丹巴哈什哈等來

上命丹巴哈什哈等近前問之奏曰噶爾丹向來有才

亦得人心自悔其深入烏闐布通之戰乃近居
克魯倫土喇等處思以言語煽惑喀爾喀及內
地蒙古使首尾不相自顧彼時可圖大事滿洲聞
之必然出兵師少則與之戰師衆則委地而退
滿兵既旋復躡襲其後如此不數年自然財賦
耗竭必致疲敝是以蓄謀而求其心志本侈今
不意

皇上統如許大兵渡人所難行之瀚海俄頃而至厄魯

特之衆望見軍容莫不畏膽於初七日早潰遁自此拋棄諸物連夜遁去噶爾丹原欲拒戰於拖諾山而不能止衆暫立又欲於額黑穆布爾哈蘇臺在柳林中臥駱駝接戰聞西路兵聲息噶爾丹乃傳令曰中路兵甚猛烈不當與戰可擊西路兵俘掠之遂向土喇行因後追者甚迫心驚而去十三日於特勒爾濟地方突遇西路大兵其時我兵有五千餘烏鎗不及二千克魯

倫河已顏烏闌以上大旱寸草不生五晝五夜
疾行於無草之地困窮已甚沿途委頓隨去者
少見西路兵先據高阜已得地利我厄魯特就
一小坡徒步拒敵大兵亦發鎗砲甚整甚暇不
知在前者為何物擁木而進又以圓且紅之物
蔽身直前既到十步內矢下如雨噶爾丹先遁
繼之丹濟喇丹津俄木布亦遁阿拉布灘之衆
仍與相拒於是滿洲騎兵圍而攻之併我輜重

妻子不遺馳馬無算牛二萬餘羊四萬餘盡取
而有之我所目擊阿奴喀通中烏鎗而死戴巴
圖爾寨桑中砲連貫四人而死博羅和卓中箭
而死後復短兵前接更有一隊非鎗非刀衝突
直入所向之處人皆披靡死者無算思我主背
誓得罪於

聖主天實厭之至於此極我輩素行殺戮拆人妻孥故
今禍及身耳我知勢之無成又念前者充使三

次來京俱荷

聖上深恩殆必活之再四思維自惜生命故棄主來降
生之殺之一惟

聖斷又問之以噶爾丹情形告曰交戰之際先衆而奔
後大兵合圍我等出於未圍之先故其後情形
不得而知

又問滿兵如何奏言我等於烏闌布通之役已知之
矣茲克魯倫土喇之來我厄魯特舉國之人皆

預知滅亡僅噶爾丹不悟常自言有成耳此皆天
數彼固不知其然而然矣我等四征諸國所向
無敵如滿洲之兵天下所無我厄魯特自當滅
矣

問噶爾丹能遁出乎抑被擒乎奏言聞噶爾丹率數
十人而走擾亂之際我未之親見縱使得脫無
以資生亦餓而死耳尋大將軍馬思喀解丹巴
哈什哈察罕哈什哈及青海博碩克圖濟農之

羅壘厄木齊等二百餘戶口至

內大臣公常泰等奏行

慶賀禮常泰等奏聞侍讀學士喇錫解到厄魯特降
人之言五月十三日賊人噶爾丹與撫遠大將
軍費揚古戰噶爾丹大敗盡棄其妻子輜重僅
以身免其餘紛紜竄散臣等伏思

皇上欲思邊塞部落人民免於災患預定

廟謨精練官兵設立火器全備糧餉諸務

皇帝不憚勞苦

親統中路大軍前行至克魯倫等處噶爾丹一聞


天威盡棄其婦女幼穉而逃

皇上出師之前早已洞知噶爾丹遇大兵必自克魯倫
土喇遁走使西路大將軍費揚古整飭車馬火
器兩路大兵約期而進

聖上廟謨若合符節噶爾丹果自克魯倫走至土喇與
大將軍軍遇大敗棄妻子破散敗走此皆

皇上深謀遠慮之所致也恭遇凱音臣等不勝歡忭之
至謹望

行宮行慶賀禮



聖祖仁皇帝親征平定朔漠方略卷二十四